



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

BANCI EKONOMI 2023 - STATISTIK MILIKAN BELIA

Pertubuhan milikan belia menjana RM80.7 bilion dalam output kasar merentasi 71.1 ribu pertubuhan pada tahun 2022.

PUTRAJAYA, 19 JUN 2025 – Pertubuhan milikan belia menjana RM80.7 bilion dalam output kasar merentasi 71.1 ribu pertubuhan pada tahun 2022. Jabatan Perangkaan Malaysia (DOSM) hari ini mengeluarkan **Statistik Milikan Belia**, berdasarkan Banci Ekonomi 2023, yang mengetengahkan prestasi pertubuhan milikan belia merentasi pelbagai sektor ekonomi. Statistik utama termasuk data berkaitan output kasar, nilai ditambah, input perantaraan, bilangan pekerja, gaji dan upah serta harta tetap di peringkat nasional dan negeri.

Mengulas mengenai prestasi keseluruhan pertubuhan milikan belia pada tahun 2022, Dato' Sri Dr. Mohd Uzir Mahidin, Ketua Perangkawan Malaysia, melaporkan bahawa sebanyak 71,112 pertubuhan milikan belia telah direkodkan, mewakili 6.5 peratus daripada jumlah keseluruhan pertubuhan perniagaan di Malaysia pada tahun tersebut. Pertubuhan ini secara kolektif telah mempunyai 374,843 pekerja dan membayar RM12.0 bilion dalam bentuk gaji dan upah. Di samping itu, mereka turut menjana RM80.7 bilion dalam output kasar, menyumbang RM44.8 bilion dalam nilai ditambah serta mencatat RM35.9 bilion dalam input perantaraan. Tambahan pula, pertubuhan milikan belia mempunyai harta tetap berjumlah RM32.2 bilion, sekali gus menggambarkan penglibatan keusahawanan belia dalam ekonomi yang semakin berkembang di landskap perniagaan negara.

Menurut Ketua Perangkawan Malaysia, "Sektor Perkhidmatan mendominasi pertubuhan milikan belia, merangkumi 97.6 peratus atau 69,450 pertubuhan. Sektor ini juga menjana output kasar tertinggi (RM69.4 bilion), nilai ditambah (RM41.6 bilion), dan bilangan pekerja (350,698 orang). Sektor Pembuatan menyusul dengan 395 pertubuhan dan output kasar sebanyak RM9.0 bilion. Sektor Pertanian dan Pembinaan masing-masing mempunyai 507 dan

760 pertubuhan, menyumbang secara sederhana kepada output kasar dan bilangan pekerja.

Beliau menambah "Pertubuhan milikan belia membayar RM12.0 bilion gaji dan upah, merangkumi 3.4 peratus daripada jumlah, dengan sektor Perkhidmatan sekali lagi mendahului pada RM11.3 bilion pada tahun 2022. Jumlah nilai harta tetap yang dimiliki oleh usahawan belia berjumlah RM32.2 bilion, atau 1.6 peratus daripada jumlah harta tetap dalam ekonomi. Sebahagian daripada ini, sektor Perkhidmatan menyumbang 93.7 peratus dengan baki selebihnya disumbangkan oleh sektor Pembuatan, Pertanian dan Pembinaan."

Menghuraikan lebih lanjut mengenai penemuan tersebut, Dato' Sri Dr. Mohd Uzir Mahidin menyatakan, "Perusahaan Kecil dan Sederhana (PKS) merupakan tulang belakang kepada aktiviti pertubuhan milikan belia, dengan 69,990 PKS milikan belia mewakili 98.4 peratus daripada keseluruhan pertubuhan milikan belia. PKS ini menunjukkan impak ekonomi yang besar, menjana RM54.8 bilion dalam output kasar dan RM32.0 bilion dalam nilai ditambah di samping mempunyai 323,312 pekerja (86.3%). Bayaran gaji mereka berjumlah RM9.7 bilion, dan nilai harta tetap pada tahun 2022 sebanyak RM23.6 bilion, menunjukkan kematangan pertubuhan milikan belia yang semakin meningkat dan komitmen terhadap operasi jangka panjang.

Di peringkat negeri, Selangor mencatatkan bilangan pertubuhan tertinggi iaitu sebanyak 19,888 pertubuhan yang menyumbang 45.3 peratus daripada jumlah output kasar pertubuhan milikan belia. Negeri ini juga merekodkan bilangan pekerja tertinggi dengan 95,817 orang serta mencatat bayaran gaji dan upah tertinggi berjumlah RM4.1 bilion. Sementara itu, Wilayah Persekutuan Kuala Lumpur berada di tempat kedua dengan 9,649 pertubuhan (13.6%) dan output kasar sebanyak RM14.4 bilion (17.9%).

Majoriti pertubuhan milikan belia dimiliki oleh warganegara Malaysia (96.1%), dan pekerja lelaki mewakili 59.1 peratus daripada bilangan pekerja di pertubuhan milikan belia. Penemuan ini menunjukkan trend demografi dalam landskap usahawan belia dan kepentingan polisi inklusif terutamanya untuk mendorong penyertaan wanita yang lebih luas."

Dato' Sri Dr. Mohd Uzir Mahidin mengakhiri kenyataannya, "Banci Ekonomi 2023 menggariskan sumbangan ekonomi yang semakin meningkat daripada pertubuhan milikan belia di Malaysia. Pertubuhan ini memainkan peranan yang penting, khususnya dalam sektor perkhidmatan, selain turut menembusi sektor Pembuatan, Pertanian dan Pembinaan. Penumpuan pertubuhan milikan belia di bandar dan negeri-negeri yang maju dari segi ekonomi, serta penglibatan dalam pelbagai

sektor, mencerminkan potensi besar untuk pertumbuhan berterusan. Menuju ke hadapan, sokongan dan intervensi dasar yang bersasar akan menjadi kunci untuk memanfaatkan potensi penuh usahawan belia sebagai pemacu inovasi dan pertumbuhan ekonomi."

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan Open Data Inventory (ODIN) 2024/25 yang dikeluarkan oleh Open Data Watch (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema 'Driving Change with Quality Statistics and Data for Everyone'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Dikeluarkan oleh:


PEJABAT KETUA PERANGKAWAN MALAYSIA
JABATAN PERANGKAAN MALAYSIA
19 JUN 2025

Paparan 1: Statistik Utama Pertubuhan Milikan Belia, 2022



Sumber: Banci Ekonomi 2023, Jabatan Perangkaan Malaysia (DOSM)

Paparan 2: Pertubuhan Milikan Belia Mengikut Sektor, 2022



Nota: Tiada pertubuhan milikan belia yang beroperasi dalam sektor Perlombongan dan Pengkuarian.

Sumber: Banci Ekonomi 2023, Jabatan Perangkaan Malaysia (DOSM)